

# TEZAU LITURGIC

**1 FEBRUARIE**

**PR.ILIE TETERKO**

## SLUJBA

SF.MUCENICI

**PERPETUA, FELICITAS,**

**SATURNINUS,**


**SECUNDULUS,**

**REVOCATUS ȘI SATURUS**

**DE LA CARTAGINA**



**ODESSA, 2020**



**СЛУЖБА**  
**святым мученицам Перпетуи и**  
**Фелицитате Карфагенским, и с**  
**ними мученикам Сатуру,**  
**Ревокату, Сатурнину и Секундулу**

**НА ВЕЧЕРНИ**

На Господи, воззвах: **стихиры, глас 1:**

Глаголом внимаючи сладким / Божественнаго и  
Всесвятаго Духа, / достославная матроно  
Перпетуе, / горесть всяку земныя жизни  
оставила еси / и смертию к бессмертной славе  
преминула еси, // Христа молящи всем  
даровати велию милость.

Христа Спаса всем сердцем возлюбивши / и  
свещу свою светло украсивши, / добродетельми  
просияли есте, / Перпетуе Богомудрая и  
Фелицитато всечестная. / Темже возшли есте в  
Небесный чертог / и, венецы страдания  
приемше, / от бед избавите нас,  
// совершающих, любовьию память вашу.

Богомудрая Перпетуя и Фелицитата всечестная,  
/ двоица Божественная, / возсиявше, яко  
звезды многосветлыя, / подвигами сияньми и  
чудес светлостьми, / озаряют сердца верных; /  
сих днесь всесвященную память совершающе,

// благословения просим и велія милости.  
Воспевающе Спаса Христа, / восхвалим  
Перпетую терпеливодушную / и с нею  
пяточисленный лик святых прославим: /  
Фелицитату твердую страстотерпцу, / Сатура  
дивнаго и Ревоката, / Сатурнина и Секундула: /  
сии бо, по вере пострадавшие, / треволения  
попраша вражия / и Спасу молятся очищение и  
оставление грехов даровати // верою  
совершающим память их.

**Слава, мучениц, глас 4:**

Двоицу мучениц, вернии, днесь в песнех  
священных похвалим, / яко леств идольскую  
низложиша, / многобожия огнь испепелиша и  
демоны посрамиша; / мучителей же ярости не  
устрашишася, / плоти терзаний и меча убо не  
убояшася, / доблественно подвизавшеся добре /  
Перпетуя славная с честною Фелицитатою, //  
явльшеся мучеников слава, купно и похвала.

**И ныне, Богородичен, глас тойже:**

Иже Тебе ради Богоотец пророк Давид /  
песненно о Тебе провозгласи / величия Тебе  
Сотворшему, / предста Царица одесную Тебе, /  
Тя бо Матерь, Ходатаицу Живота показа, / без  
отца из Тебе вочеловечитися благоволивый Бог,  
/ да Свой паки обновит образ, истлевший  
страстьми, / и заблуждшее горохищное обрет  
овча, / на рамо восприим, ко Отцу принесет / и

Своему хотению / с Небесными совокупит Силами, / и спасет, Богородице, мир / Христос, имеяй велию и богатую милость.

**Или Крестобогородичен, глас тойже:**

**Не** рыдай Мене, Мати, / зрящи на Древе повешена Твоего Сына и Бога, / на водах Повесившаго всю землю неодолимо / и всякое творение Создавшаго; / ибо воскресну и прославлюся, / и адова царствия сокрушу крепостию, и погублю того силу, / и связанных избавлю от злодейства его, яко Благоутробен, // и Отцу Моему приведу, яко Человеколюбец.

**На стиховне стихиры, глас 4:**

**З**арю просвещаемая трисолнечнаго Божества, / Перпетуе преблаженная, / веру Христову дерзновенно исповедала еси / и, страдальческим венцем украсився, / с пострадавшими с тобою мучениками на Небесех ликуеши, // с нимиже моли спастися нам.

**Стих:** Святим, иже суть на земли Его, / удиви Господь вся хотения Своя в них.

**Д**обре подвизався евангельския веры ради, / себе самую предала еси на вольное мучение и нуждную смерть, / приводя с собою лик мучеников, Перпетуе блаженная. / С нимиже пострадала еси / и венцы победы прияла еси; // с теми молися о нас, всеславная.

**Стих:** Многи скорби праведным, / и от всех их избавит я Господь.

Богомудрая Перпетуя, / всеславная Фелицитата,  
/ Сатур чудный и Ревокат славный, / Секундул  
терпеливодушный / со дивным Сатурнином  
страдаша, / враги победивше и возсиявше яве,  
яко многосветлыя звезды, / уясниша верных  
сердца // и прелести отгнаша тьму  
светозарением Духа Святаго.

**Слава, глас 4:**

Сияет, яко солнце / память страстотерпицы  
Твоя, Господи, Перпетуи, / и светлостью своею  
прогоняет демонскую тьму, / упраздняему верою  
и терпением дивныя жены, / и пять  
сострадальцев с собою на похваление приводит.  
/ Ихже молитвами даруй нам, Христе Боже, //  
мир и велию милость.

**И ныне, Богородичен, глас тойже:**

Призри на моления Твоих раб, Всенепорочная, /  
утоляющи лютая на ны востания, / всякия  
скорби нас изменяющи. / Тя бо Едину, твердое  
и известное Утверждение имамы, / и Твое  
предстательство стяжахом, / да не постыдимся,  
Владычице, Тя призывающи, / потщися на  
умоление Тебе верно вопиющих: / радуйся,  
Владычице, всех Помоще, // Радосте и Покрове,  
и Спасение душ наших.

**Или Крестобогородичен, глас тойже:**

На Кресте Тя яко узре пригвождена, Господи, /  
Агница и Мати Твоя дивляшешся, / и что видение  
сие взываше, Сыне вожделенне? / Сия Ти  
неверный собор воздаде беззаконный, / иже  
многих Твоих чудес насладивыйся? // Но слава  
неизглаголанному сошествию Твоему, Владыко.

**Тропарь, глас 4:**

Пришедшую ко Христу волею / и украсившую  
добродетельми сердце, / Боголепно воспоем  
всечудную Перпетую, / та бо посрами  
языческую дерзость / и приведе с собою лик  
мученический, / просиявши, яко солнце,  
посреди беззаконников, // и по кончине явися  
земным утверждение Божественное.

**НА УТРЕНИ**

**По стихословии седален, глас 2:**

Добре исповедавши Христово Имя, пред враги  
беззаконнующими, / законно пострадала еси  
Его ради, честная Перпетуе, // и ныне  
молишися всем даровати велию милость.

**Слава, и ныне, Богородичен, глас тойже:**

Устами и сердцем величаем Тя, Матерь Божию:  
/ Ты же, рождающая Бога, // не отрини нас от  
Твоего заступления.

## Канон святым, глас 2.

### Песнь 1

**Ирмос:** Грядите, людие, / поим песнь Христу Богу, / раздельшему море, / и наставльшему люди, яже изведе из работы египетския, // яко прославися.

Любовию Христовою распалема, мученице Перпетуе, / мирское отвергла еси омрачение; / Небесному же приблизилася еси Свету невещественному всею душею.

Род презревши и юже от богатства светлость, Перпетуе всечестная, / вместо всех Христа стяжала еси.

Возложився мученический собор Всевидцу Богу, / и, Того любовию души привязавше, разрешиша союз злобы / и разрешение грехов подавают верою тех блажащим.

**Богородичен:** Светлыми лучами Твоего Сына, Богородице, / просвети омраченную мою душу, / страстей смущение отжени, Твоими, Чистая, ходатайствы.

### Песнь 3

**Ирмос:** На камени мя веры утвердив, / разширил еси уста моя на враги моя. / Возвесели бо ся дух мой, внемгда пети: / несть свят, якоже Бог наш, // и несть праведен паче Тебе, Господи.

**П**роцвела еси любовью Христовою и  
Божественною мудростию, / терпением же мук,  
Перпетуе, безумие обличаеши гонителей.

**Л**юбве ради Зиждителя, о страстотерпицы, /  
всю мирскую лесть истинно презревше, /  
Единого возжелесте Христа, взывающе: / несть  
праведен паче Тебе, Господи.

**П**росвещшеся Троичным сиянием, мучениц  
доблее сопряжение, / идольское разруши  
омрачение, Христу взывающе: / несть праведен  
паче Тебе, Господи.

**Богородичен:** Прогоняющее оружие грехи и  
страсти души моя буди, Дево, / и покажи мя,  
якоже другой рай, / безнаветен и соблюден  
Тобою и приносящий цветы Духа.

### **Седален, глас 3:**

**Р**азжегшеся любовью Божественною, мученицы  
Господни, / огонь безбожия кровей струями  
угасисте / и, возсиявше световидно, яко звезды,  
// всю подсолнечную уясните.

### **Слава, и ныне, Богородичен:**

**П**речистыя Твои руце, Дево Мати, простерши, /  
покрый уповающия на Тя и к Сыну Твоему  
зовущия: // всем подаждь, Христе, Твоя  
милости.

## Песнь 4

**Ирмос:** Пришел еси от Девы, / не ходатай, ни Ангел, / но Сам, Господи, воплощся, / и спас еси всего мя человека. / Тем зову Ти: // слава силе Твоей, Господи.

**Благодарное** и светоносное торжество славных памяти твоей, Перпетуе всехвальная, / крепко дерзость вражию поправши, яко солнце, возсия, / в немже велегласно Христу вопием: / слава силе Твоей, Господи.

**Твое** зачатие и вольную смерть, Жизнодавче, / собор возжеде страдальцев и, многовидных болезни претерпев, / в неболезненное и Божественное преиде веселие, песнопоя благодарственно: / слава силе Твоей, Господи.

**Зверей** ярости не убоялися есте, страстотерпцы добропобеднии, / мудростию же духовною и терпением напастей / обличили есте мучительское безбожие, поюще Христу: / слава силе Твоей, Господи.

**Богородичен:** Возсия из утробы Твоея, Отроковице Неискусобрачная, Отчее сияние — Христос, / и просвети вселенную, распинаемь, / и бесовскую тьму потребил еси.

## Песнь 5

**Ирмос:** Света подателю и веков Творче, Господи, / во свете Твоих повелений настави нас; //

разве бо Тебе иного бога не знаем.

**З**аконно за Христа пострадавшие, Перпетуе и Фелицитато всеславнии, / обогатитесь венцем нетленным истинно и Царство Небесное приясте, Спасу поюще: / разве бо Тебе иного бога не знаем.

**Ч**уден, якоже звезда, быв Церкви, / посреде мучеников возсиял еси, Сатуре славне, / мученическими осияя зарями мир паче солнца, поюще: / разве бо Тебе иного бога не знаем.

**Т**ерпением ран всякое низложше вражие шатание, Ревокат и Сатурнин твердии оружницы, / зверьми терзаеми, победную Спасителю воспеваху песнь: / разве бо Тебе иного бога не знаем.

**Богородичен:** Закона исполнение, высшая Херувим, / родила еси Божия Слова воплощена, Сына Единородна, / Егоже о рабех Твоих, Дево Всечистая, умоли.

### Песнь 6

**Ирмос:** В бездне греховней валяясь, / неизследную милосердия Твоего / призываю бездну: // от тли, Боже, мя возведи.

**П**рославися твоими ранами Царь Славы Христос, Секундуле страстотерпче, / и Той неизреченныя тя доблести исполни, поюща Ему: / от тли, Боже, мя возведи.

**Я**ко досточудна мужественная твоя душа,  
Перпетуе славная, / мечное усечение  
добровольне приемши, / дух предала еси в руке  
Владыки всех, радуясь и поющи: / от тли, Боже,  
мя возведи.

**М**атеринства радости прикоснувся, чадо  
оставила еси, / да шествие страстьми  
сотвориши ко Отцу Небесному, Фелицитато  
дивная, / поющи, жизнь вечную дарующему  
Спасу: / от тли, Боже, мя возведи.

**Богородичен:** Милости Твоя, Богородице,  
сподоби мя, / премилостиваго Спаса рождшая,  
/ своею кровию от тления человеки  
избавльшаго.

#### **Кондак, глас 4:**

**В** ризы от вышния благодати истканныя, /  
мученицы всечестнии, ныне одеялися есте, / тли  
и мертвости риз совлекшеса, / на смерть и раны  
дерзнули есте крепко / и Христу предстали есте,  
венцы носяще подвигов своих, / о нас Того,  
славнии, молитесь // даровати нам мир и велию  
милость.

#### **Песнь 7**

**Ирмос:** Да преславное рождество Твое, Христе, /  
еже от Девы прообразиши яве, / неопалимы в  
пещи отроки сохранил еси, / песньми поющыя  
Тебе: // отцев, Боже, благословен еси.

**Я**ко блаженна в непорочном пути ходила еси, /  
колени благоразумно преклонила еси  
Избавителю, / душу же предав Владыце в руки,  
/ яко благовоннейшую жертву, Перпетуе  
Богомудрая.

**П**обедоносица к Небесному Царству востекла  
еси, Фелицитато чудная: / по искушении бо мук  
от диких зверей, Христа Бога исповедавая, /  
скончалася еси за Него, во главу усечена.

**М**удрии страдальцы, веры оружницы, / муки  
врагов пребеззаконных доблественне  
победивше, / купно венцы нетленнии пришла.

**Богородичен:** **С**вятых Святый, в Тебе свято  
вселився, Чистая Богородице Дево, / воплощен,  
из Тебе раждается, за еже спасти верою  
зовущия: / отцев, Боже, благословен еси.

## Песнь 8

**Ирмос:** **П**ещь иногда огненная в Вавилоне  
действия разделяше, / Божиим велением халдеи  
опаляющая, / верныя же орошающая, поющия:  
// благословите, вся дела Господня, Господа.

**Н**и ласкание, ни лесть, / ни слава земных  
возможе отсеци веры вашей течение,  
страдальцы Христовы, / темже и радуетесь  
ныне.

**Е**динаго Благоутробнаго Царя Славы  
исповедающе, / мудрии страдальцы прияша

почести победы, вопиюще благодерзновенно: /  
благословите, вся дела Господня, Господа.

**Конец мучения** приясте купно, страстотерпцы  
Господни славнии, / зверьми и мечем  
умерщвляеми, Христу вопиюще: / благословите,  
вся дела Господня, Господа.

**Троичен:** Яко Единицу естеством, Тя пою,  
Божество Всесвятое, / в триех ипостасях  
Единого Создателя, радуясь зову: /  
благословите, вся дела Господня, Господа.

**Богородичен:** Слово Отца Небесного  
Единосущное, / Адамово избавление от кровей  
Твоих девственных воплотися, Дево Марие  
Чистая, / Емуже благодарственне зовем: /  
благословите, вся дела Господня, Господа.

## Песнь 9

**Ирмос:** Безначальна Родителя Сын, Бог и  
Господь, / воплощься от Девы нам явися, /  
омраченная просветити, / собрати расточенная:  
// тем всепетую Богородицу величаем.

**Царское украшение** Церкви Христовы, /  
страстей Спасовых изображение мученица  
твердая, верных утверждение, / песнями да  
восхвалится Перпетуя всеславная.

**Песнями** восхвалим Божественныя мученицы, /  
Перпетую и Фелицитату, вкупе Ревоката и  
Сатура, / славных Сатурнина и Секундула. /

Тии бо радовахуся, зряще себе, мечи  
скончаваема, / Христу же победную песнь  
поюще.

**Стратотерпцы** мужески вооружившесе верою,  
/ Господним крестом ополчения низложиша  
вражия / и венцы нетленные прияша.

**Явистесе** посреде мучителей, аки агнцы  
нескверныя посреди волков суровых, / сих  
зверовидное побеждающе, / и Христу, яко  
жертва благоприятна, принесостесе.

**Богородичен:** Глас Тебе ангелов, Пречистая,  
вопием: / радуйся, спасение всех человеков / и  
славных мучеников Божественное венчание.

### **Светилен:**

**Предстояще** ныне Трисианному Великому Свету  
/ и пребывающе в неизреченной светлости со  
всеми святыми, / Богосиянии мученицы,  
помяните всех нас, / память вашу светоносно  
совершающих.

### **Слава, и ныне, Богородичен:**

**Света** Превечнаго родила еси нам, Христа, Бога  
нашего, Пречистая Дево, / избавльшаго весь  
мир от лести диавола. / Темже молим Тя: не  
престай Его молити, / да подаст нам милость  
Свою.

## На стиховне стихиры Осмогласника.

### Слава святым, глас 1:

Мечем скончаваеми, / посекоште идољское  
неистовство / и, свещу неугасшу душевную  
соблюдше, / внидоште со Христом в чертог  
Небесный, / страстоносицы честныя Перпетуе и  
Фелицитато, / демонов же полки страдальчески  
победисте // и ныне молитесь о душах наших.

### И ныне, Богородичен, глас тойже:

Радуйся, Богородице Дево, / радуйся, похвало  
всех вселенных, // радуйся, Пречистая Мати  
Божия, Благословенная.

### Или Крестобогородичен, глас тойже:

У Креста Твоего предстоящи, Слово Божий, /  
Агница и Непорочная Мати Твоя, / рыдающи  
вопяще: / увы Мне, Сыне, како умираеши на  
Кресте? / Увы Мне, Свете Мой сладкий, / где  
Твоя доброты ныне зайде зрак, // краснейший  
паче всех человек?

## НА ЛИТУРГИИ

Прокимен, глас 4: Святым, иже суть на земли  
Его, / удиви Господь вся хотения Своя в  
них. Стих: Презрех Господа предо мною выну, /  
яко одесную мене есть, да не подвижуся.

Апостол к Галатом, зачало 214.

Аллилуиа, глас 4: Возваша праведнии, и  
Господь услыша их, и от всех скорбей их избави

их. **Стих:** Многи скорби праведным, и от всех их избавит их Господь.

**Евангелие от Иоанна, зачало 51.**

**Причастен:** Радуйтесь, праведнии, о Господе, правым подобает похвала.

[К завтрашней памяти святых мучениц Перпетуи и Фелицитаты и с ними пострадавших мучеников (†203) выкладываю в «Уставные заметки» шестриричную службу им, составленную клириком Одесской епархии Украинской Православной Церкви **протоиереем Илией Тетерько.**]

